

(3) Nobilissimo Juveni
 D. D. M. T. Brunnichio
 Amico suo perdilecto
 s. pl. d.
 Car. Linne
 Equ.

Lætabar magnopere Tuas accipere literas, quum non noveram ubi nunc temporis degeres, antequam Tuæ die 18 datæ reddebantur Leydæ. Jam degis ubique plurima collectanea asservantur. Optarem Tecum esse eaque perlustrare. Ne obliviscaris Insecta, Papiliones &c., quorum stupenda exoticorum copia prostat Amstelodami et alibi. Si adeas D. Burmannum Professore Amstelod., D. Royenum Professore Leydensem, D. Gronovium Consulem Leydensem, devotissima mea ipsis dicas; sunt enim hi inter Belgas primarii triumviri artis nostræ.

Si adeas Hagam, inquiras D. Pallas Berolinensem, juvenem acutissimum in Entomologicis, Ornithologicis et tota natura versatissimum; cum meis salutes verbis et dicas, quod ut ut ejus acceperam in appendice novas species Avium, ad eum Hagam dedi literas, sed quod responsorias non obtinuerim.

Quomodo procedit cum opere illo, quod delineat Coleoptra, cujus tantum accepi primam tabulam e Belgio.

Quod Motacilla alat Cuculum, quotidie per æstates vidi, sed cur Alauda simul eum nutriret, ego non capio.

Multum Tibi obstrictus pro pulcherrimis Tuis observationibus de Avibus, quas adeo candide communicasti. Sudat jam Systema Naturæ, in quo videbis Tuum nomen ad omnia et singula quæ me edocuisti.

Aves per Consulem Koustrup missas non dum accepi.

Bradypum, si adhuc vivat, videbis Amstelodami apud Blaue Jaen; dicas mihi quænam ibi hodie animalia occurrant.

Museum rerum naturalium quod instruxit piè defunctus Princeps Arausiacus erit stupendum; nec potest aliter esse, cum India orientalis facile tota, Caput b. spei et Surinamum, quæ proferunt maxime stupenda naturalia, Belgis subjecta,